

आकाशवाणी

खबरां ---

1 केन्द्रीय मंत्रीमंडल नै मुख्य भरै च किट्ठे चुनां करोआने आस्तै इक राष्ट्र इक चुनाव लेई खडेरी गेदी उच्च स्तरी कमेटी दिएं सफारशें गी मंजूर करी लैता ऐ।

2 जम्मू-कश्मीर च विधानसभा चुनावं दे पैहले गेड़ तैहत अज्ज मतदान होआ।

3. कांग्रेस अध्यक्ष मल्लिकार्जुन खड़गे होरें हरियाणा विधानसभा चुनावं सोयां पैहले अज्ज पार्टी दा घोषणापत्र जारी कीता।

4. राष्ट्रपति द्रौपदी मुर्मु होरें आक्खेआ जे अनुसंधान ते विकास दे क्षेत्र च महिलाएं दी मती थवा मती हिस्सेदारी नां छड़ी मुख्य दी सांस्कृतिक ते आर्थिक प्रगति आस्तै महत्वपूर्ण ऐ, संगुंआं महिलाएं दे जीवन च गुणवत्ता आहला सुधार आनने आस्तै बी लाजमी ऐ।

5. प्रधानमंत्री नरेन्द्र मोदी इस महीने दी 21 सोयां 23 तारीक तगर अमरीका दी यात्रा पर होडन।

## Cabinet Decisions

सरकारै देश'भरै च किट्ठे चुनां करोआने आस्तै इक राष्ट्र इक चुनाव लेई खडेरी गेदी उच्च स्तरी कमेटी दिएं सफारशें गी मंजूरी करी लैता ऐ। अज्ज नर्मी दिल्ली च संवाददाताएं कन्नै गल्लबात करदे होई सूचना ते प्रसारण मंत्री अश्विनी वैष्णव होरें गलाया जे साबका राष्ट्रपति राम नाथ कोविन्द हुंदी प्रधानता च खडेरी गेदी कमेटी नै सियासी पार्टिएं ते माहिरें-विशेषज्ञें सने बक्ख-बक्ख सरबंधत पक्खें कन्नै तफसीली सलाह-सुत्तर कीता। उनें आखेआ जे इसी द'ऊं चरणें च लागू कीता जाहग। वैष्णव होरें दस्सेआ जे पैहले चरण च लोकसभा ते विधानसभा चुनां किट्ठे होडन जदके पंचैत ते नगर पालिकाएं ज्नेय मुकामी निकायें दे चुनां आम चुनाएं दे 100 दिनें दे अंदर-अंदर करोआए जाडन। मंत्री होरें दस्सेआ जे सरकारै विज्ञान ते टेक्नोलाजी दे खेत्तर गी बढ़ावा देने लेई चंद्रयान-4 मिशन ते षुक्र ग्रैह सरबंधी वीनस ऑर्बिटर मिशन गी मंजूरी दिती ऐ। वैष्णव होरें दस्सेआ जे सरकारै हाड़ी रूत 2024-25 लेई फास्फेट ते पोटाश हैलें पर पोषण आधारित सब्सिडी गी बी मंजूरी दिती ऐ। एहदे पर 24 जहार करोड रुपें शा मतें दा खर्च होग। केंद्री मंत्री होरें दस्सेआ जे मंत्रिमंडल नै एनिमेशन,

विजुअल इफेक्टस, गेमिंग, कॉमिक्स ते एक्सटेंडेड रियलटी लेई इक राष्ट्रीय उत्कृष्टता केंद्र खडेरने दी बी मंजूरी दिती ऐ।

<><><><><><>

## Voting

जम्मू-कश्मीर च अज्ज पैहले गेड़ दे असैम्बली चुनांस तैहत 7एं जिलें दिएं 24 विधानसभा सीटें लेई पूरी रमानदारी कन्नै मतदान होआ। हासल होई दी जानकारी मुजब जम्मू-कश्मीर च संझां 5 बजे तगर कुल 58.19 फीसद मतदान दर्ज कीता गेआ ऐ। जम्मू संभाग दे 8 असैम्बली हलकें च संझां 5 बजे तगर 72.13 फीसद मतदान दर्ज कीता गेआ ऐ। मतदान दा कम्म बड्डलै 7 बजे सख्त सुरक्षा बंदोबस्तें हेठ शुरु होआ हा जेहड़ा संझां 6 बजे तगर जारी रेया। इक दहाके परैन्त जम्मू-कश्मीर च होआ करदे इनें चुनाएं तैहत चिनाब घाटी दे त्रै जिलें - रामबन, डोडा ते किश्तवाड़ च अज्ज वोट पोआए गे न। इनें त्रौनें जिलें च कुल 7 लख 14 हजार योग्य मतदाता न ते कुल 64 मेदवार चुनां मैदान च खड़ोते दे न। जम्मू-कश्मीर दे मुख चुनां अधिकारी हुंदे पास्सेआ दिती गेदी जानकारी मुजब, किश्तवाड़ जिले दे त्रै विधानसभा हलकें इंद्रवाल, किश्तवाड़ ते पाइंडर नागसेनी च 77.3 फीसद मतदान दर्ज कीता गेआ। इंद्रवाल च 80.6 फीसद, किश्तवाड़ च

75.4 फीसद ते नर्मी कायम कीती गेदी पाइडर-नागसेनी सीट लेई

76.80 फीसद लोकें वोट पाने दे अपने हक्कै दा इस्तेमाल कीता ऐ।

तोआईं डोडा जिले च संझां 5 बजे तगर कुल 69.87 फीसद मतदान दर्ज कीता गेआ ऐ। डोडा जिले दे भद्रवाह असैम्बली हलके च 65.27 फीसद, डोडा हलके च 70.21 फीसद ते डोडा वैस्ट च 74.14 फीसद लोकें वोट पाए न। ईआं गै रामबन जिले च संझां 5 बजे तगर 67.67 मतदान होआ। जिले दे रामबन हलके च 67.34 फीसद ते बनिहाल हलके च 68 फीसद लोकें वोट पाए न।

<><><><><><>

## Campaign

जम्मू-कश्मीर च बाकी रौहदे द'ऊं चरणें दे मतदान लेई बक्ख-बक्ख सियासी पार्टिएं दे नेता ते प्रचारक, मतदाताएं गी अपने पक्ख च करने लेई पूरी टिल्ल ला करदे न। एहदे लेई बक्ख-बक्ख सियासी नेता प्रदेश दिएं बक्ख-बक्ख थाहें पर रैलियां ते रोड शो करै करदे न। प्रधानमंत्री नरेन्द्र मोदी होर कल श्रीनगर दे शेरे-कश्मीर पार्क च इक रैली गी संबोधित करडन ते उंदे इस दौरै लेई उत्थे सुरक्षा दे बड़े निग्गर प्रबंध कीते गेदे न। प्रदेश च चुनाएं दे ऐलान दे बाद घाटी च

बीजेपी दी एह पैहली बड्डी रली होग। बीजेपी नै कश्मीर थमां छड़े 19 मेदवारें गी गै चुनां मैदान च तोआरे दा ऐ ते केईं सीटां आजाद मेदवारें ते होरनें पार्टिं लेई छोड़ी दिती दिआं न। बीजेपी दा आखना ऐ जे कल होने आहली प्रधानमंत्री हुंदी रैली च 20 ज्हार शा 30 ज्हार लोकें दे शामिल होने दी मेद ऐ। एहदे अलावा बीजेपी दे केईं बड्डे नेता ते श्रीनगर थमां पार्टी दे मेदवार बी इस रैली च शामिल होडन। प्रधानमंत्री मोदी होर कल रियासी जिले च श्री माता वैष्णो देवी जी दे आधार शिविर कटरा दे स्पोर्ट्स स्टेडियम च बी इक चुनावी रैली गी संबोधित करडन। तोआईं कांग्रेस पार्टी बी मतदाताएं गी अपने पक्ख च करने लेई पूरा जोर ला करदी ऐ। कांग्रेस पार्टी दे स्टार प्रचारक सचिन पायलट होर लोकसभा चुनाएं दे ओंदे चरणें लेई पार्टी मेदवारें दे हक्कै च प्रचार करने दे मकसद कन्नै जम्मू पुज्जी गेदे न।

<><><><><><>

### Congress Haryana

कांग्रेस अध्यक्ष मल्लिकार्जुन खड़गे होरें हरियाणा विधानसभा चुना सोयां पैहले अज्ज पार्टी दा घोषणापत्र जारी कीता। नमी दिल्ली च पार्टी मुख्यालय च खड़गे होरें आक्खेआ जे राज्य च कांग्रेस सरकार बनने मगरा 7 वादे पूरे कीते जाडन। उने करसानें गी घट्टोघट्ट

समर्थन मूल्ल ते हर परौआर गी 300 यूनिट बिजली दी कनूनी गारंटी देने दी घोषणा कीती। खड़गे होरें एह भी आक्खेआ जे राज्य च दो लक्ख भर्थियां कितियां जाडन। ते परानी पेंशन योजना बहाल कीती जाग। कांग्रेस अध्यक्ष होरें आक्खेआ जे महिलाएं गी दो हजार रुपे फीह म्हीनें दिते जाडन। खड़गे होरें आक्खेआ जे हरियाणा च कांग्रेस सरकार 500 रुपे च एलपीजी गैस सिलेंडर ते विधवाएं, वरिष्ठ नागरिकें ते दिव्यांगजनें गी 6 हजार रुपे म्हीनां पेंशन देग। कांग्रेस अध्यक्ष होरें आक्खेआ जे हरियाणा गी नशा मुक्त बनाया जाग। उने 25 लक्ख रुपे दा मुफ्त इलाज ते फौरी फसल मुआवजा देने दी भी घोषणा कीती। कांग्रेस नै गरीब परोआरें गी साढ़े त्रै लक्ख रुपे दी कीमत पर 100 गज दे प्लॉट ते दो कमरें दा मकान देने दा भी वादा कीता। खड़गे होरें जातिगत सर्वेक्षण ते क्रीमी लेयर दी हद्द बदाईए 10 लक्ख रुपे करने दी घोषणा कीती

<><><><><><>

### Withdrawl

जम्मू-कश्मीर विधानसभा चुनाएं दे त्रीए ते खीरी गेड़ लेई दाखल नामांकन वापस लैने दे खीरी रोज कल 34 मेदवारें अपने नामांकन वापस लेई लैते। इस गेड़ तैहत केंद्र शासित प्रदेश दे 7 जिलें च

फैली दिएं 40 विधानसभा सीटें लेई वोट पोआए जाडन। 34 मेदवारें आस्सेया नामांकन वापस लेई लैने दे बाद हून इस गेड लेई 415 मेदवार चुनां मतदान च रेही गेन। इस गेड तैहत पैहली अक्टूबर गी वोट पोआए जाडन। मुख चुनांस अफसर हुंदे दफतर आस्सेया जारी जानकारी मुजब सब्बनें शा मते 16 मेदवारें कुपवाड़ा जिले च अपने नामांकन वापस लैते न जिसले जे साम्बा जिले च कुसै बी मेदवार नै अपना नामांकन नेई परताया। ध्यानजोग ऐ जे कुल 486 मेदवारें नामांकन दाखल कीते हे।

<><><><><><><>

### **Shah-100 days**

राष्ट्रपति द्रौपदी मुर्मु हों आकखेआ जे अनुसंधान ते विकास दे क्षेत्र च महिलाएं दी मती थवा मती हिस्सेदारी नां छडी मुल्क दी सांस्कृतिक ते आर्थिक उन्नडती आस्तै महत्वपूर्ण ऐ, सगुंआं महिलाएं दे जीवन च गुणवत्ता आहला सुधार आनने आस्तै बी लाजमी ऐ। ओह अज्ज दपैहरी जयपुर दे मालवीय राष्ट्रीय प्रौद्योगिकी संस्थान च आयोजित 18में दीक्षांत समारोह गी सम्बोधित करा र'दियां हियां। उने आकखेआ जे जेकर महिलाएं गी बरोबर मौके थहोडन तां ओह मती महारत हासिल करी सकदियां न। राष्ट्रपति हों आकखेआ जे

असैं 2047 तकर भारत गी विकसित राष्ट्र बनाने दा लक्ष्य रखे दा ऐ। उने विद्यार्थियें सोयां आह्वान कीता जे राष्ट्रीय विकास दी दिशा च नेतृत्व प्रदान करना उन्दी जिम्मेदारी ऐ। अपने ज्ञान ते पक्के धर्यै दे बल पर देशै दे भविष्य गी आकार देने आस्तै अगगे औना लोडचदा। राष्ट्रपति होरें आखेआ जे विद्यार्थियें दी महत्वाकांक्षा मुल्खै दे मूजब होनिया लोडचदियां ते उनें गी समाज ते मुख्य दे विकास लेई बत पदरी करनी लोडचदी। उने आखेआ जे राष्ट्रीय महत्व दे संस्थानें दे विद्यार्थियें थवा मुख्य पैहले आहली भावना कन्नै कम्म करने दी मेद रक्खना स्वाभाविक ऐ। राष्ट्रपति मुर्मु होरें विद्यार्थियें सोयां अपील करदे होई आखेआ जे ओह अपने निजी जीवन च ऐसे जतन करन जिसदे कन्नै पर्यावरण गी घटोघट्ट नुकसान होऐ ते पर्यावरण संरक्षण आस्तै नमियां तकनीकां विकसित कीतियां जानियां चाईदियां। राष्ट्रपति होरें विद्यार्थियें गी उन्दी बेहतर कारकरदगी आस्तै सुन्ने दे तगमे दिते राजस्थान दे राज्यपाल ते उत्थुंआं दे मुख्यमंत्री भजनलाल शर्मा होरें बी इस कार्यक्रम गी सम्बोधित कीता। राष्ट्रपति होर अज्जे थवा त्रै राज्य राजस्थान, मध्य प्रदेश ते झारखंड दे दौरै पर न।

## Rijju-Waqf Bill

संसदीय मामले सरबन्धी केंद्री मंत्री किरेन रिजिजू होंरें आखेआ ऐ जे वक्फ तरमीमी बिल 2024 मुस्लिम समुदाय दी भलाई बेहतरी लेई आंदा गेआ ऐ। आकाशवाणी समाचार कन्नै इक विशेष गल्लबात दौरान रिजिजू होंरें आखेआ जे इस बिल दी मदद कन्नै सरकार इस गल्लै गी यकीनी बनाग जे वक्फ दिएं सम्पत्तिएं दा अज्जै-कल्लै दे साइंसी ते पारदर्शी ढंग्गै नै पूरी जवाबदेही कन्नै प्रबंधन कीता जाई सकै। किरण रिजिजू होंरें आखेआ जे एह बिल जिस सांझी संसदीय समिति दे विचार लेई भेजेया गया ऐ ओह इस बरे संसद दे सयाले आले इजलास कोला पैहले हफते दे खीरी ध्याड़े तगर अपनी रिपोर्ट सोंपदी देग।

<><><><><><>

## CBSE-Registraiton

केंद्री माध्यमिक शिक्षा बोर्ड सी.बी.एस.ई दे 2025 बरे दे बोर्ड म्तेहानें च हिस्सा लैने आले 9मीं ते 11मीं क्लास दे विद्यार्थिं दा रजिस्ट्रेशन अज्जै थमां शुरू होई गेआ ऐ। सी.बी.एस.ई दी अधिसूचना मुजब रजिस्ट्रेशन कराने दी खीरी तरीक 16 अक्टूबर रक्खी गई ऐ। सी.बी.एस.ई दी मानता हासल स्कूल [cbse.gov.in](http://cbse.gov.in) पर अपने बच्चें दा

नां दर्ज करी सकदे न। अधिसूचना च दस्सेया गया ऐ जे 2025726 आले सत्र च 10मीं ते 12मीं दे बोर्ड मतेयान च ओह सब्बै विद्यार्थी मतेयान देई सकडन जिंदा नां ते ब्यौरा उंदे स्कूलें दी तरफा दाखल कराई दित्ता गेदा ऐ। स्कूलें गी विद्यार्थिं दा ब्यौरा दाखल करने कोला पैहले सी.बी.एस.ई पोर्टल पर अपने आपै गी बी रजिस्टर करना होग। सीबीएसई नै आखेआ ऐ जे स्कूलें गी एह पक्का करना होग जे कोई बी अनाधिकृत ते असरबंध यानि कोई बी बाहरला विद्यार्थी जेहड़ा उस स्कूल दा विद्यार्थी नेई ऐ, उंदा ना दाखल नेई कीता जाग। बोर्ड नै इब्बी आखेआ ऐ जे विद्यार्थिं गी सी.बी.एस.ई दे अलावा कुसै होर बोर्ड च दाखल नेई कराया जाई सकदा। स्कूलें गी आखेआ गेदा ऐ जे विद्यार्थी दा नां ते होर जानकारी सेही तरीके ते सलीके सिर दर्ज कीती जा तां जे मगरा विद्यार्थी गी कोई दिक्कत पेश नेई आ।

<><><><><><>

### PM-America Yatra

प्रधानमंत्री नरेन्द्रब मोदी इस महीने दी 21 सोयां 23 तारीक तगर अमरीका दी यात्रा पर होडन। ओह वाशिंगटन दे डेला-वेयर च 21 सितंबर गी क्वालड नेताएं दे चौथे शिखर सम्मोलन च हिस्सार लेंडन। इस बरे दे सम्मेलन मगरा अमरीका दे अनुरोध पर अगला क्वाड

शिखर सम्मेलन 2025 च आयोजित करने पर भारत नै सहमति जाहर कीती ऐ। विदेश मंत्रालय नै आकखेआ ऐ जे बैठक च क्वाड नेता पिच्छले इक बरे दौरान होई दी संगठन दी प्रगति दी समीक्षा करडन। ओह हिन्द-प्रशांत क्षेत्र दे मुखें गी उनदे विकास लक्ष्यें ते आसे तांगे गी पूरा करने च सहायता करने आस्तै अगले इक बरे आस्तै कार्य सूची भी तय करडन। मोदी होर इस महीने दी 23 तारीक गी न्यूयॉर्क च संयुक्ता राष्ट्रक महासभा च "समिट ऑफ द फ्यूचर" गी संबोधित करडन। इस सम्मेलन दा विषे होग- बेहतर भविष्य आस्तै बहु-पक्खी हल। सम्मेलन च मती गिनतरी च वैश्विक नेताएं दे शामिल होने दी संभावना ऐ। इस मौके पर प्रधानमंत्री मोदी दुनिया भरै दे बकख बकख नेताएं कन्नै दपक्खी बैठकें च आपसी हित दे मुद्दें पर चर्चा करडन। प्रधानमंत्री न्यूयॉर्क च भारतीय समुदाय दे लोकें गी बी संबोधित करडन। ओह प्रमुख अमरीकी कंपनियें दे मुख कार्यकारी अधिकारियें कन्नै बी गल्ल बात करडन। इसदे च आर्टिफिशल इंटेलिजेंस, क्वांटम कंप्यूटिंग, सेमीकंडक्टर ते जैव प्रौद्योगिकी जनेह महत्व पूर्ण क्षेत्रें च दोनं मुखें बशकार सहयोग बदाने पर चर्चा कीती जाग।

<><><><><><>

## Trump-Modi

अमरीका च राष्ट्रपति औहदे लेई रिपब्लिकन मेदवार डॉनल्ड ट्रंप होरें आकखेआ ऐ जे ओह् अगले हफते प्रधानमंत्री नरेंद्र मोदी हुन्दे कन्नै मलाटी करडन। ट्रंप होरें मिशिगन च भारत कन्नै अमरीकी व्यापार दे बारै च बोलदे होई एह घोषणा कीती। 21 सोयां 23 सितंबर तकर मोदी होर अमरीका दे दौरै पर होडन इस दौरान दोनै बशकार मलाटी होनै दी मेद ऐ। 2017 सोयां 2021 दौरान ट्रम्प होरें अमरीका दे राष्ट्रपति दे तौर पर अपने कार्यकाल दौरान नरेंद्र मोदी हुन्दे कन्नै इक मजबूत व्यक्तिगत सरबंध साझा कीते। उन्दे सरबंध अमरीका-भारत सरबंधें गी खास तौर पर रक्षा ते रणनीतिक सहयोग च मजबूत करने लेई कम्म कीता। उनकी मजबूत साझेदारी करी "क्वाड" जनेई पहल दे माध्यम राएं सुरक्षा सहयोग गी प्रोत्साहन थहोआ।

<><><><><><>

## FIR-Criminal Laws

भारतीय न्याय संहिता दे नमें आपराधिक कन्नूनें तैहत अजें तोड़ी कुल 5 लकख 56 जहार F.I.R-आं दर्ज कीतियां गेइयां न। त्रै नमें आपराधिक कन्नू, जिंदे च भारतीय न्याय संहिता 2023, भारतीय

नागरिक सुरक्षा संहिता 2023 ते भारतीय साक्ष्य अधिनियम 2023 शामिल न, इस बरे पैहली जुलाई थमां लागू होई गेन। गृह मंत्रालय दे इक्क बड्डे अधिकारी नै जानकारी दिती ऐ जे एह F.I.R-आं इस बरे पैहली जुलाई कोला लेइए 3 सितंबर दौरान दर्ज कराइयां गेइयां न। उनें दस्सेया जे 8 लकख कोला मते अधिकारिएं गी पुलस अनुसंधान ते विकास ब्यूरो ते राष्ट्रीय फोरेंसिक साइंस युनिवर्सिटी दी तरफा इनें त्रऊं कनूनें बारे आयोजित सिखलाई कार्यक्रमें ते वेबीनारें दी मदद कन्नै सिखलाई दिती गेई ऐ। नमें आपराधिक कनूनें बारे जानकारी देने लेई इक नमां पोर्टल NCRB-SANKALAN बी तैयार कीता गेदा ऐ।

<><><><><><><>

### Asian-Champions

प्रधानमंत्री नरेंद्र मोदी होरें मर्दे दी एशियाई हॉकी चैंपियन्स ट्रॉफी 2024 जितने पर भारतीय टीम गी ममारकबाद दिती ऐ। अपने ममारकी सनेए च प्रधानमंत्री होरें आखेआ जे भारतीय टीम दे शानदार प्रदर्शन ते समर्पण नै समूलचे मुल्खै दा मान बधाया ऐ ते सारे देशवासिएं गी उंदे पर गर्व ऐ। जियां कि पैहले बी खबर दिती जाई चुकी दी ऐ जे कल खेइगे गेदे फाइनल मकाबले च पिछले बारी दे

चैंपियन भारत नै मेजबान चीन गी 1-0 कन्नै हराइए 5मीं बारी एह खताब अपने नां कीता। भारतीय टीम नै इस जबरदस्त मकाबले दे चौथे क्वार्टर च गोल करिए खताब पर कब्जा बरकरार रक्खेआ। एह गोल जुगराज सिंह नै कीता। इस टूर्नामेंट च भारत नै इक्क बी मैच नेई हारेया। चीन दुए ते पाकिस्तान त्रीए नम्बरै पर रेहा।

<><><><><><>